

共同經課 - 1 申命記二十六章一節~十一節

1 「你已經到耶和華——你的上帝所賞賜你做業的地承接來倚起伊，2 就著對耶和華——你的上帝賞賜你的地，將所收逐項起頭熟的土產提淡薄，下佇筐裡，去耶和華——你上帝所欲揀安置伊的名的所在，3 著去見當時做祭司的，給伊講：『我今仔日對耶和華——你的上帝講明，我已經到耶和華對咱的列祖咒誓賞賜咱的地。』4 祭司就對你的手接彼筐來，下佇耶和華——你上帝的壇前。5 你著佇耶和華——你上帝的面前講：『我的祖是一個啲欲死的亞蘭人，落去埃及寄腳佇遐。人額少少，佇遐成做一國大闊強、人額闊多。6 埃及人歹款待阮，苦楚阮，用苦工教阮做。7 對彼霎阮哀求耶和華——阮列祖的上帝，耶和華聽阮的聲，看見阮的苦楚、阮的著磨、阮的壓迫，8 耶和華就用大權能的手及伸出的手骨，及大通驚的事及神蹟奇事，導阮出埃及，9 閣導阮到此所在，用此個地賞賜阮，就是流奶及蜜的地。10 看啊，此個地起頭熟的，耶和華啊，你所賞賜我的，我今已經帶來。』後來你著將伊下佇耶和華——你上帝的面前，佇耶和華——你上帝的面前敬拜伊。11 你及利未人，以及恁中間的出外人，著因為耶和華——你上帝所賞賜你及你的家眷一切的福份來歡喜。

共同經課 - 2 詩篇九十一篇一節~二節，九節~十六節

1 踮佇至高者隱密的所在者，彼個人欲倚起佇全能者的蔭影。2 論到耶和華我欲講：伊是我逃閃的所在，是我的山寨，是我的上帝，我所倚靠者。9 因為耶和華你是我逃閃的所在；你曾用至高者做你倚起的所在，10 就災害袂到佇你，瘟疫亦袂倚近你的布棚。11 因為伊欲為著你吩咐伊的使者，佇你一切的路保護你。12 in欲用手扶你，免得你的腳觸著石。13 你欲踏獅及毒蛇，塌獅仔肫及大尾蛇。14 因為伊真疼我，我就欲救伊；因為伊識我的名，我就欲安置伊佇高的所在。15 伊求叫我，我就欲應伊；伊佇危急的時，我欲及伊佇啲；我欲救伊，互伊尊貴。16 我欲用長歲壽互伊滿足，互伊看見我的救恩。

共同經課 - 3 羅馬書十章八b節~十三節

8 是講：言語是近佇你，是佇你的嘴，佇你的心。（就是阮所傳此個信的言語。）9 就是你若用嘴認耶穌做主，用心信上帝互伊對死人中起來，就會得著救。10 因為人用心信，致到得著義；用嘴認，致到得著救。11 聖經講：「見若信靠伊的人不致見誚。」12 因為猶太希利尼攏無分別，像一個主是眾人的主，款待攏總求伊的人極其富裕。13 因為「見若求叫主的名的人，欲得著救。」

共同經課 - 4 路加福音四章一節~十三節

1 耶穌受聖神充滿，對約但河倒來，互聖神導伊佇曠野裡，2 四十日久互魔鬼試伊。諸個日的中間無食甚麼物；後來，就枵。3 魔鬼給伊講：「你若是上帝的子著教此個石變做餅。」4 耶穌應伊講：「有記載講：『人的活毋若倚靠餅。』」5 魔鬼閣導伊緝上高，一目轟(nih)久用天下萬國互伊看，6 就給伊講：「此個一切的權，及in的榮光，我欲互你，因為此個已經交互我，出在我欲互甚麼人就互伊。7 所以你若拜佇我的面前，就攏總是你的。」8 耶穌應伊講：「有記載講：著拜主——你的上帝，獨獨服事伊若定。」9 閣導伊到耶路撒冷，互伊倚佇殿的尾溜，給伊講：「你若是上帝的子，著對遮家已越落去；10 因為有記載講：伊欲為著你命令伊的天使保護你；11 閣講：「in欲用手扶你，免得你的腳觸著石。」12 耶穌應伊講：「有講：『莫得試主——你的上帝。』」13 魔鬼已經盡逐項的試，就暫時離開伊。